

Pesta laut Lumut dapat sambutan paling meriah

14 JUL 1975
LUMUT, Ahad. — Berbagai acara sukan darat dan laut telah diadakan di Pesta Laut Lumut di sini dengan mendapat sambutan hangat dari orangramai.

Lebih dari 10 ribu orang telah membanjiri pekan ini untuk menyaksikan acara-acara sukan itu tiap-tiap hari sejak 3 Julai hingga 6 Julai.

Bagi acara memanjat tiang licin pasukan Ladang Sitiawan telah berjaya menjadi johan dengan mengalahkan enam pasukan lain. Tempat kedua dimenangi oleh Ladang Pundut Lumut dan tempat ketiga Kampung Koh, Sitiawan.

Tiap-tiap pasukan mempunyai seramai 10 orang peserta dan mereka dikehendaki memanjat tiang licin yang disapu dengan minyak grease setinggi 20 kaki. Sepanjang acara itu bermula penonton-penonton tidak berhenti ketawa dengan telatah lucu peserta tersebut.

S-takraw

Bagi acara sepaktakraw pula, pasukan Bomba dari Ipoh "A" telah menjadi johan sementara pasukan Bomba "C" yang juga dari Ipoh menjadi naib johan. Sebanyak 34 pasukan tempatan dan luar telah mengambil bahagian.

Satu acara sukan yang tidak kurang menarik ialah perlumbaan merentas desa dari Sitiawan ke Lumut Terbuka. Tempat pertama disandang oleh M. Lachumanan dari Damar Laut, tempat kedua M. Subramaniam dari Sitiawan dan tempat ketiga P. Raman yang juga dari Sitiawan.

Sementara itu, dalam perlumbaan merentas desa dari Sitiawan ke Lumut bagi 20 tahun ke bawah telah dimenangi oleh S. Jegathesmaran dari Sitiawan, tempat kedua P. Maniam dari Kampung Bintang, Sitiawan, dan tempat ketiga Anthony dari Kampung Selamat, Sitiawan.

Rentas desa

14 JUL 1975
Seorang murid Sekolah Menengah Air Tawar, M. Anutha, 15 tahun, telah berjaya menjadi johan merentas desa dari Sitiawan ke Lumut bagi sekolah-sekolah terbuka.

Yu Cheng King, 16 tahun, yang juga dari sekolah yang sama mendapat nombor dua dan Amani nombor tiga.

Dalam acara sukan laut, pasukan Mohamad bin Sulaiman dari Teluk Kopiah, telah menjadi johan dalam acara perahu berkayoh lima orang lelaki, tempat kedua kumpulan Sharom bin Saad dari Kampung Baru, dan tempat ketiga kumpulan Mat bin Nasir dari Kampung Kuala Sepit.

Bagi acara-acara sampan berdayung seorang lelaki, tempat pertama Sharom bin Saad, tempat kedua Othman bin Khata, dan tempat ketiga Ibrahim bin Hamid, ketiga-tiganya dari Kampung Baru.

Dalam acara perahu layar sehala seorang, Haji Yahya bin Husin, dari Kampung Baru, telah mendapat tempat pertama, tempat kedua Harun bin Abu Bakar dari Tanjung Batu.

Kumpulan Mohamad bin Sulaiman telah berjaya menjadi johan dalam acara perahu berkayoh tujuh orang lelaki dari Kampung Teluk Kopiah, tempat kedua kumpulan Jamaluddin Ahmad dari Kampung Baru dan tempat ketiga kumpulan Sharom bin Saad dari Kampung Baru. (SI).